

海國圖志

中西紀事

卷二十四

上終

瑞之

卷之四

瑞芝

中西紀略

中西紀事卷之二十四上

江上塞安

海疆殉難記上

是編紀殉難之臣不論文武不敘官階悉以死事年月之先後為次其兵勇紳民婦女之死難者附著于後仿敘錄之例兼備紀事之體俾後之蒐入史志者得以攷見其本末

定海殉難道光二十年六月

浙江定海縣知縣姚懷祥

浙江定海縣典史全福

大令號履堂福建侯官縣人嘉慶戊寅舉人道光乙未大挑一等分發浙江補定海縣以庚子五月蒞任踰月而難作方夷船之游奕於舟山也初以為賈舶不設備繼見向北行駛之船大小二十六號輪烟蔽天總兵方整兵出

洋突有火輪船二直抵道頭街探量水勢大令偕游擊羅建功登舟詰其求
意言語不通懷中出漢字照會文書一角脅大令獻城據浙省探報稱文書
水師子爵伯麥一係統領陸路兵官布爾利其文內稱啟定海縣主
速將所屬海島堡臺一切投獻惟候半個時辰即行開礮轟擊等語大令不
答退謀於鎮將請即於道頭街扼要為守城計總兵張朝發曰城非吾責吾
領水師知扼海口而已若縱之登岸大事去矣大令乃與少尉謀合赴村壘
招募鄉勇而身率城守兵登陴塞四門以土袋示無出意六月初七日總兵
被礮轟擊受傷落水弁兵昇之登岸送至鎮海羅建功等託以城門重閉亦
先後走大令見事急坐南城上招鄉民登城守无應者少尉所募之鄉勇甫
至城聞變亦潰是日四更夷梯兵城而入大令奔赴北門外普慈寺前投池
中死少尉執刀守獄門寇至脅之降不屈遇害

吳興人有為大令作傳者謝貳尹蘭生刊入思忠錄

謝官于浙庚子辛丑間
隨大營幫辦軍務多得

之目擊者撰有
思忠錄刊行

其畧云君先世藉江甯之上元嘗與同僚問蔣侯青骨為神

事敬歎不已歷署象山龍游嵎縣二十年定海安吉二邑缺君以次當得安吉太府念定海重地宜諳練吏以屬君五月之任邑有雪交亭明華亭張太傅殉節所君至修葺之詩以志慨六月初三日課書院為臣不易題越日英夷犯定海君及總兵張朝發飛請甯波提督乞援兵不至總兵中傷回鎮君度力孤不能守以印交僕送郡中及城陷赴城北同歸域為明魯王諸臣叢葬處下有梵宮池投池死之典史全福同殉節事聞奉

旨賜卹舟山及杭城之吳山皆建祠祀之

湯世瑄殉難紀事詩序云全君福字疇五甘肅吏員為人剛直幹事明決逆回張格爾謀叛曾在軍營當差揚威將軍長相國陝甘制府楊宮保以軍功咨給六品頂戴儘先選授定海典史庚子六月城陷持刀立獄門有勸之去者曰吾職在此安敢逃及寇至大罵不屈遂被戕

按烏撫定海失守奏內稱初八日英夷陷定海知縣姚懷祥典史全福不屈

投水被害身死蓋投水指大令被害指少尉未分析也又附片奏稱定海知縣姚懷祥典史全福一竝死節均屬可嘉容臣查其家屬下落另行照例請卹等因後吏部議照陣亡例給雲騎尉世職以次給恩騎尉世職岡替禮部議照六品官例給全葬銀一百兩致祭銀八兩入祀本籍府城昭忠祠據此則亦循例之卹典耳洋氛三載擾及四省遙遙三千餘里其守土知縣之殉難者惟大令一人而不能得從優之卹典則浙撫之奏報未能詳核也

江甯侯大青甫為予言其妻姪王某在定海為徵比小席值是年六月之役其家人聞變相聚而哭不復意其生還也踰月王踉蹌歸述大令殉難之前二日集幕中刑錢以下語之曰守土之義不可以不死君等寇至則去壘草圖之乃按諸幕友束修一一分致相與揮淚而別是日一晝夜間署中上下星散某以一小席隨身一童僕定海人先期走避獨力屏當天明始出行七里而礮聲作矣觀此知大令非徒惓惓于友誼亦見其造次顛沛間從容不

苟也

又按明之同歸域在補陀茶山上其下梵宮祠即成仁祠故址也雪交亭者華亭張太傅肯堂之邸第太傅守翁洲築雪交亭於邸中央以一梅一梨開花則兩頭相接語蘇北人汝應元曰此吾止水也厥後大兵破翁洲至公邸雪交亭下見遺骸二十有七則公及其四姬一子婦一女孫諸僕婦暨參軍事之儀部蘇兆人等大兵驚愕卻步歎息命扁其門時公之故將都督汝應元已披緇為補陀僧赴帥營請葬得許而倉卒間無所得棺乃火化之藏以三大甕瘞之于補陀之茶山應元築寶僊菴奉公祀終其身一時相繼殉難者則吳稚山尚書鍾繼以下二十餘人更有監國嬪妃及大臣文武眷屬之在城中者又數十人皆葬于山上故名曰同歸域其下為成仁祠祀殉難諸臣即大令投水處也大令當城陷出北門過成仁祠曰此昔人殉難之所吾何憾焉遂投普慈寺中死予謂太傅以雪交亭為止水死志已決今大令

到任即首葺之不踰月而難作則是亭者又大令止水之先識也海外彈丸之地纍然為古戰場越二百年洋氛再至劫運重逢前有守土之二臣後有折衝之三師舟山片壤浩氣鍾焉與弔湘哀郢同千古矣

鎮守定海舟山等處總兵官張朝發

總兵福建人據島撫參奏內稱張朝發前據咨稱該鎮于初七日自卯至午在船與夷兵互相轟擊被傷左腿甚重落水扶板登岸不得已帶傷入城而臣等提訊羅建功等據稱夷船入港以後會同文武商酌接仗僉謂逆船恃其礮火止利於水不利於陸擬將水陸各軍一半撤至離城一里之半路享扼要地方堵住一半撤至城中防守衆謀皆同旋向該鎮剴切稟明即該縣姚懷祥及各紳士等亦皆求請該鎮進城督率保護乃該鎮傳調防城各營兵弁在於港面迎擊致被該逆轟斃官兵無數迨至該鎮帶傷進城該游擊等同至城濠姚懷祥已將四門緊閉不能懸城而上該逆徹夜攻城將東門

攻破紛紛而入該官兵既失其所該游擊等法無所施遂冒死到鎮等因臣等查該總兵張朝發當逆船突入定海羅建功等擬請分兵或戰或守衆謀僉同收合尙有一千餘兵可以堅守何至猝然城陷乃該鎮張朝發慢諫撤守以致喪師失城情罪實屬重大等因奉

旨革職拿問在案又七月初七日奏稱已革總兵張朝發經臣等正在飭遵將看守之張朝發等收間禁即据甯波府鄞縣知縣舒恭受以該革總兵自被礮傷後日漸沈重飲食不進醫治无效于七月初五日戌刻身故經該縣會同城守都司李宗白親往看查該革總兵實係火毒內攻身死等情詳報前來臣等伏查張朝發雖因傷重殞命現奉

飭部定罪其尸棺應仍飭看守同羈禁之羅建功等一併恭候

諭旨遵行等因据此則總兵中創殞命核以當日受傷落水搶救回鎮其非有意脫逃藉傷諉卸可知也至謂其慢諫撤守据羅建功等一面之詞無論陸

戰未必可恃而總兵所督者水師防守洋面正其專責所謂縱之登岸則大事去者固其料敵之明欲求先發之制迨接戰不利則彼強我弱衆寡懸殊据奏內收合之兵不過千餘豈能敵二十六艘之勍寇哉以是年廈門之役較之則當日之誤誤於浙洋之全無準備豕突而來措手莫及豈總兵一人之罪哉攷總兵之死與裕帥之殉難於鎮海洋池被人搶救輿至餘姚而卒大畧相同徒以烏撫參奏在前不得同邀卹典浙人以此惜之故附記于大令殉難之後以慰其不瞑目之忠魂云

又按是時任甯紹台道桂昌聞定海失守勢將內犯旁皇憂慮自盡而死遺書言兵單餉乏戰守兩難末云苟有一綫生機愚不至此伊相謂其身家念切蓋諄之也本管失守何至畏罪自盡即關課短絀亦可奏請豁免毋庸以賠墊為虞其愚見所及不過因逆兵內犯不敢偷生負國輾轉憂疑遂萌輕生一念其志未嘗不可哀而束手無謀喪膽褫魄抑亦不學無術者之所為

與

粵東沙角殉難二十年十二月

三江副將陳連升同子舉鵬

千總清鶴

據海國圖志言沙角大角之戰陳連升以地雷扛礮擊斃夷兵三四百人又言陳連升父子以兵六百當夷衆數千殲其兵數百以無援救而敗又粵東探報言陳副將父子殺賊最多既敗賊奪其尸而齕割之据此則琦相當日不撤防兵而有副戎父子禦之於口外關提軍祥總戎堵之於口內英人豈得肆其狡逞耶扛礮得力勝於飛礮以其靈動而轉運易也請逆將軍來粵途次接奉

廷寄言陳連升父子業已加等賜卹惟將弁傷亡甚多恐該兵丁陣亡尚不止此數著該將軍等查明琦善所奏有無隱飾等情然則沙角之役遺漏之兵

丁固多即將弁亦尙不止此數也

虎門殉難二十一年二月

提督廣東全省水師駐劄虎門關天培

虎門水師游擊秦廷章

軍門號滋圖江蘇淮安人据粵東抄傳少穆制使信函或云家書或云寄友人書其事在沙角既破之後虎門未失之先制使知軍門有素見相國不肯增兵料其必死信內言大角沙角兩口被夷人占踞造屋山上若小船闖進三門則鎮口唾手可得關提李鎮雖在靖遠威遠等處而兵單難以扼守衆文武僉欲大添兵力而靜老到此四地尚恐因增兵而阻和議懇求再四乃准暗添二百名乘夜偷渡官民均極憤憤又言十二月十五打仗之後義律却用文書照會提督並寄靜老信限三日內回覆否則再攻靜老連趕數信與義律屬不令人知而逆夷聲稱要事事全依方能歇手關李專弁請兵僅

許密添二百名其差官來轅哭訴云提鎮兩位在礮臺相向而泣既無援兵安得不坐以待斃予謂提鎮能以死報

國是其分所宜然但何不將此情形透切一奏死後或有伸冤之日未知關滋圃能見及此否又据裕帥咨會蘇撫文內言英夷日縱日驕各官再四告求添兵僅許密遺二百名乘夜偷渡致有大角沙角之事其時若即添派重兵多募水勇與省城文武協力防勦事勢尙不至十分掣肘乃視同僚於膜外事逆夷如頑父一任提鎮大員痛哭請兵堅不調派雖重要之虎門僅止防兵數百提鎮相向而泣安得不復失事云云兩制使所言耳聞目擊異地同符嗚呼蹇叔哭師伯仁由我軍門之死夫豈戰之罪哉

按粵東撫議定後奉

旨查關天培陣亡時靖遠礮臺官兵究係何人首先潰散飭奕山查明具奏隨据水師提督吳建勳咨稱据水師右營提標之把總何居桐查明首先潰散

之兵丁郭標歐振彪等詳請解省審辦後据兵丁郭標等供稱關提督陣亡之前一日伊等曾經放礮擊中夷船蒙提督各賞給洋銀四員交把總何居桐收存迨夷兵攻礮臺伊等親見何居桐被夷人捉拏下船次日放回伊等會向何居桐索討賞銀並未分給曾經口角適奉查辦遂挾嫌具稟等語隨提訊何居桐供稱賞銀遺失自認挾嫌實不能指出首先潰散之人等語因發交南海縣看管何居桐畏罪自縊身死靖逆遂以何居桐已死該兵丁屢訊不承此外又無確證勢不能將當日防兵概行提訊徒滋紛擾應即擬結等因入奏奉

硃批不實不盡之至事已如此即使先逃之兵丁僥幸苟免豈有槩行誅戮之理朕只恨世道人心何至如是之不誠不實朕以重任付諸臣諸臣無非還朕一欺字再不解是何居心也欽此按海國圖志謂英夷在粵募漢奸三千人每人給安家銀三十員每月工食銀十員而我守虎門兵月餉不及三兩

提督關天培憫兵之窮苦自捐賞卹每兵銀二員而議者猶劾以水師挾制提督要賞尙望其出死力乎予又聞粵東人言關提軍善識礮性凡高下遠近發皆洞中因虎門之役水師貪受土規火藥皆襟以沙土軍門後發之礮試輒不中方知受給憤激自刎是則以軍門之善恤將士而不能得其死力且反為夷用粵省之官兵大概可知且何居桐畏罪自盡則當夷人捉挈下船保無洩漏軍情之語恐被兵丁指出為罪更大是以情急自盡也王廉訪所謂惟恐逆夷不勝則鴉片不行者正此輩矣

烏涌殉難

同上

湖南鎮寧總兵祥福

巖山游擊沈占鰲

守備洪連科

按烏涌離省六十里原奏所謂楚南官兵失利者即此軍也總戎帶鎮寧兵

六百守之不勝遂與其麾下二將死焉

福建廈門殉難二十一年七月

金門鎮總兵江繼芸

護延平副將凌志

署淮口都司王世俊

水師把總紀國慶

水師把總楊肇基

水師把總李啟明

據卹報總兵以救護戰臺被夷船轟擊落水死副將以下皆力戰死均得
旨賜卹在案

定海二次殉難二十一年八月

鎮守定海總兵官葛雲飛

鎮守浙江金衢嚴等處總兵官鄭國鴻

鎮守江南江北壽春等處總兵官王錫朋

署定海參將張玉衡

處州副將託安泰

定海之再陷也三鎮轉戰七晝夜同時殉難是年七月裕帥督師於鎮海檄三鎮以主客五千兵防守定海洋面葛鎮駐師于半塘鄭鎮分守竹山門王鎮分守曉峯嶺當英人攻定海先駕舟駛進竹山門官兵轟擊斷其頭船之大桅旋即竄去三鎮自八月十二日至十六日以扛礮扛銃截夷兵千餘並擒其二帥斬之軍前士氣益厲會天雨日轉戰泥淖中方擬堅壁以休士卒而夷兵忽舍舟登岸分三路進攻士卒皆殊死戰殺傷相當未幾曉峯嶺竹山門同時潰鄭王二鎮皆中礮死葛鎮勢益孤援兵不至夷兵乘勝進攻半塘之土城潰葛鎮身中四十餘創旋裏旋戰植立於屋石間而斃義勇徐保